

大方廣佛華嚴經普賢菩薩行願品卷第七

伏七

大方廣佛華嚴經卷第七

伏七

唐罽賓國三藏般若奉

詔譯

入不思議解脫境界普賢行願品

爾時海幢比丘從其眉間白毫相中出無量
百千阿僧祇佛刹極微塵數帝釋天王威德

伏七

一

光明超過天衆捨離世間一切欲樂於諸境
界而得自在摩尼寶珠以繫其頂身光映蔽
諸天宮殿震動一切須彌山王覺悟一切放
逸天衆歎福德力說智慧力生其樂力持其
志力增其所有清淨念力堅其所發菩提心

力讚樂見佛令除世欲讚樂聞法令厭世間
讚樂觀智令絕世染止脩羅戰斷煩惱諍滅
怖死心發降魔願興立正法須彌山王成辦
衆生一切事業念念調伏無量衆生如是所
作周徧法界從其額上出無量百千阿僧祇
佛刹極微塵數諸梵天王色相端嚴世間無
比威儀寂靜言音美妙請佛轉法歎佛功德
令諸菩薩心生歡喜能辦衆生無量事業如
是普徧十方法界從其頭上出無量百千阿
僧祇佛刹極微塵數諸菩薩衆皆以相好莊

嚴其身其諸菩薩各於其身肢節毛孔一切
普放大光明雲顯現諸佛往昔所行菩薩行
海宣說菩薩種種妙行所謂普徧十方一切
世界稱揚讚歎一切諸佛往昔所行檀波羅
蜜施者受者及所施物并所隨順相應行海
示導一切慳吝衆生永離慳著成就捨心常
行惠施攝取衆生令住無上檀波羅蜜顯示
諸佛相好功德令得衆寶莊嚴世界及示依
正所出生因令諸衆生愛樂修習普徧十方
一切世界稱揚讚歎一切諸佛往昔所行尸

波羅蜜并所隨順相應行海令諸衆生於五
欲境深生厭離於諸佛境專意趣求除顛倒
想恒正思惟斷邪分別永離諸惡念菩薩戒
攝諸衆生住大慈悲稱讚解脫護持如來究
竟戒品普令衆生住於佛戒說一切有悉皆

伏七

二

如夢了達諸法自性皆空說諸欲樂無有滋
味令諸衆生遠離欲縛出煩惱垢普徧十方
一切世界稱揚讚歎一切諸佛往昔所行忍
波羅蜜并所隨順相應行海令諸衆生得法
自在得心自在具忍辱力稱揚讚歎金色身

業離瞋恚垢起慈悲行止殺害心絕畜生道
普徧十方一切世界稱揚讚歎一切諸佛往
昔所修勤波羅蜜并所隨順相應行海令諸
菩薩精進勇猛爲一切智勤求正法供養承
事一切如來恭敬讚歎心無疲厭令諸世間
不起放逸攝取衆生令離苦蘊入佛究竟圓
滿智海普徧十方一切世界稱揚讚歎一切
諸佛往昔所修禪波羅蜜并所隨順相應行
海令其散滅塵勞障翳永捨憍慢不起貪瞋
蔭清涼雲除煩惱熱竭生死海摧業結山調

伏衆生安住妙法究竟令其心得自在普徧
十方一切世界稱揚讚歎一切諸佛往昔所
修般若波羅蜜并所隨順相應行海普耀正
見智慧電光令諸衆生照達本性普震清淨
妙法雷音令諸衆生增長功德摧滅一切我
伏七
慢高山拔出一切諸見毒箭抉除一切疑惑
三
翳膜令諸衆生得自在智普徧十方一切世
界稱揚讚歎一切諸佛往昔所修方便波羅
蜜并所隨順相應行海隨順世間種種所作
令諸衆生究竟成熟雖普調伏一切衆生而

於衆生無所染著雖普照明諸佛衆會而於
衆會心無所著雖離生死而於諸趣自在受
生雖現世間而於涅槃入出自在雖能了達
生死涅槃無二無別而常善巧饒益衆生安
住菩薩圓滿自在超出世間到於彼岸普徧
十方一切世界稱揚讚歎一切諸佛往昔所
成願波羅蜜并所隨順相應行海令諸菩薩
盡未來際乘四願輪遊正覺路徧周刹海利
樂衆生摧無明山裂愛欲網解衆結縛永滅
無餘示現神通種種變化令諸衆生壽命自

在普徧十方一切世界稱揚讚歎一切諸佛
往昔所成力波羅蜜并所隨順相應行海演
說菩薩大總持力方便法音妙辯才力成熟
衆生廣大願力摧伏魔怨智自在力制諸外
道心無畏力身力堅固猶若金剛能碎一切
大鐵圍山能滅十方一切劫火能竭海水能
吞猛風掌擎虛空所有世界而於身力無有
損減令諸衆生淨治三昧普於一切自在受
生普徧十方一切世界稱揚讚歎一切諸佛
往昔所修智波羅蜜并所隨順相應行海分

別演說種種智地所謂普生諸佛十力無畏
一切功德具足智地普滿諸佛一切相好自
在莊嚴具足智地普發菩薩一切大願具足
智地普徧攝受一切衆生具足智地普爲衆
生顯示無我具足智地普徧觀察一切衆生
種種心念具足智地普徧分別一切衆生根
解差別具足智地普徧隨順一切衆生信樂
差別具足智地普徧了知一切衆生甚深業
海無量差別具足智地普徧趣入一切衆生
無量願海心樂差別具足智地從其頂上肉

伏七

四

髻之中出無量阿僧祇佛刹極微塵數如來
之身其身最勝世無能比諸相隨好清淨莊
嚴威光赫奕如真金山無量光明普照十方
演妙圓音普周法界示現無量大神通力爲
諸世間普雨法雨隨其所應皆令獲益所謂
爲坐菩提場諸菩薩雨大法雨名平等現前
智爲灌頂位諸菩薩雨大法雨名普門法界
爲法王子位諸菩薩雨大法雨名入諸菩薩
普莊嚴門爲童真位諸菩薩雨大法雨名住
堅固山大法智雲爲不退位諸菩薩雨大法

雨名普徧莊嚴平等海藏爲成就正心位諸
菩薩雨大法雨名以金剛智普照境界爲方
便具足位諸菩薩雨大法雨名普攝衆生自
性莊嚴門爲生貴位諸菩薩雨大法雨名如
來圓滿隨順世間爲修行相應位諸菩薩雨

伏七

五

大法雨名演法本際悲愍世間爲治地位諸
菩薩雨大法雨名積集法藏爲初發心諸菩
薩雨大法雨名普攝衆生平等莊嚴爲廣大
信解諸菩薩雨大法雨名如來願藏無盡解
脫爲無色界諸天雨大法雨名普門智無盡

藏爲梵世諸天雨大法雨名無量教聲普門
智藏爲他化自在天雨大法雨名能生法力
資具無盡藏爲諸魔衆雨大法雨名種種心
幢勤求一切智爲化樂諸天雨大法雨名淨
念智寶住種種善軌爲兜率諸天雨大法雨
名菩薩生意種種願寶幢爲夜摩諸天雨大
法雨名隨順如來淨念歡喜藏爲忉利諸天
雨大法雨名疾見如來出生莊嚴愛樂藏爲
諸龍王衆雨大法雨名出生菩薩馱離龍趣
種種神變歡喜幢爲夜叉王衆雨大法雨名

見佛歡喜普徧法界如來神變藏爲乾闥婆
王衆雨大法雨名一切如來集法音聲爲阿
脩羅王衆雨大法雨名金剛智輪大法境界
爲迦樓羅王衆雨大法雨名無邊光明出生
一切如來方便爲緊那羅王衆雨大法雨名
一切如來饒益世間殊勝智雲爲摩候羅伽
王衆雨大法雨名愛樂速疾增長法爲諸人
王衆雨大法雨名得一切衆生勝智慧法爲
地獄衆生雨大法雨名寂靜音聲正念莊嚴
爲畜生衆生雨大法雨名隨順如來具智慧

藏無惡業道聲爲閻羅王界衆生雨大法雨
名不捨衆生出生如來波羅蜜聲爲諸厄難
處衆生雨大法雨名寂靜音聲普徧安慰悉
令衆生永離憂苦咸得入於賢聖衆會如是
所作充滿十方一切法界海幢比丘各於其

伏七

六

身一切毛孔一一皆出無量阿僧祇佛刹極
微塵數大光明網一一光明具阿僧祇色相
一一色相有阿僧祇莊嚴一一莊嚴現阿僧
祇境界一一境界辦阿僧祇事業如是普徧
十方法界爾時善財復於如是大光網中悉

見海幢往昔所修一切菩薩三世所行檀波
羅蜜悉捨一切內外所有圓滿施行往昔所
修一切菩薩三世所持尸波羅蜜從初發心
盡未來劫誓捨身命不起一念毀犯之心往
昔所修一切菩薩三世相應忍波羅蜜或遇
損害頭目手足斷截肢節惡言毀辱悉能安
受無有動亂恒思捨離怨害之心觀自他身
無有我相生大慈悲成一切智以是因緣獲
得菩薩具足相好自在色身示一切身於一
切處經一切劫受一切苦勤求正法利益衆

生不起一念猒退之心種種神變普徧十方
等衆生界現一切身如影隨形究滿法界徃
昔所修一切菩薩三世所行勤波羅蜜所學
三世諸佛菩薩勇猛精進離相妙行所現種
種神通變化震動十方一切世界諸大海水

伏七

七

令諸衆生精勤匪懈猒生死海出離魔界一
切外道無不怖懼一切魔軍無不摧碎光照
十方一切法界令諸菩薩修種種行種種神
變普利衆生徃昔所修一切菩薩三世所求
禪波羅蜜或見受身生諸族姓或爲國王遇

善知識發菩提心厭棄國城出家學道立大
誓願種種威儀堅持禁戒身心寂靜修諸禪
定往昔所修一切菩薩三世所成般若波羅
蜜爲欲開發一切智故勤求佛法生正見心
爲欲拔濟諸衆生故事善知識親近承事不
違言教尊重恭敬深生信心禮拜供養情無
懈倦勤求如來一句正法徧捨一切內外所
有於身命財心無吝惜乃至勤求一切法句
亦復如是如是念念盡未來際諸所修行皆
爲成就一切衆生究竟圓滿智慧業故往昔

所修一切菩薩三世相應方便波羅蜜能於一切諸趣類海普現一切衆生色相相似身雲以種種威儀善巧攝受普令衆生獲大饒益往昔所求一切菩薩所發三世願波羅蜜所謂供事一切諸佛願成熟一切衆生願嚴淨一切佛刹願如是所發一切誓願圓滿修行所成功德具足一切如來相好修諸對治一切善法滅除一切生死過患盡未來劫利益衆生誓願無盡往昔所修一切菩薩三世相應力波羅蜜所謂出生大願力普供諸佛

力普淨佛刹力普修妙行力普化衆生力往
昔所修一切菩薩三世所行智波羅蜜恒以
一切微細境界圓滿智力啓悟法界一切衆
生無明睡眠咸令開覺究竟出生一切智道
海幢比丘各於其身從足至頂乃至一切毛
孔之中所現境界善財童子於念念中無不
明見爾時善財一心觀察海幢比丘深生渴
仰憶念彼不思議三昧解脫隨順彼不思議
三昧自在思惟彼不思議利益衆生巧方便
海深入彼不思議無作妙用普莊嚴門愛樂

伏七

八

彼不思議甚深信解清淨境界觀察彼不思議莊嚴法界清淨智安住彼不思議受佛究竟加持智出生彼不思議菩薩自在力堅固彼不思議菩薩大願力增廣彼不思議菩薩諸行力如是住立思惟觀察一日一夜乃至經於七日七夜半月一月乃至六月復經六日過此已後海幢比丘從三昧起善財爾時以身布地恭敬作禮起立合掌歎未曾有讚言聖者如此三昧希有奇特此三昧門最爲甚深此三昧門最爲廣大此三昧門境界無

量此三昧門神變難思此三昧門光明無等
此三昧門莊嚴無數此三昧門威力難制此
三昧門境界平等不動不亂此三昧門普照
十方一切世界此三昧門方便無量有勝堪
能所以者何如此三昧利益無盡以能除滅
一切衆生無量苦蘊故所謂能令一切衆生
斷貧窮業故出地獄苦故免畜生趣故絕餓
鬼因故閉諸難門故開人天道故親近一切
安樂法故出生人天殊勝樂欲令其愛樂定
境界故能令增長有爲樂故能爲顯示勤求

伏七

九

出離三界法故能爲引發勤求無上菩提心
故能使增長大福智聚出生因故能令速疾
增長廣博大悲心故能令出生廣大願力故
能令照明菩薩智道故能使莊嚴波羅蜜道
故能令深入最勝大乘故能令明了普賢妙
行故能令趣入諸菩薩地智光明故能令積
集成就菩薩諸願行故能令安住一切智智
境界中故能令清淨一切菩薩變化力故能
令勤求一切加持自在力故聖者此三昧門
名爲何等海幢告言善男子此三昧名普眼

捨得亦名般若波羅蜜境界清淨光明亦名
平等清淨普莊嚴門善男子我以修習此平
等清淨普莊嚴門而爲上首具足圓滿百萬
阿僧祇最勝最尊無比三昧善財白言聖者
此三昧境界究竟唯如是耶海幢言善男子
此三昧門境界甚深廣大無量若有修習身
心寂靜入三昧時了知十方一切世界無所
障礙往詣十方一切世界無所障礙入出十
方一切世界無所障礙莊嚴十方一切世界
無所障礙修治十方一切世界無所障礙嚴

淨十方一切世界無所障礙見一切佛普徧
十方無所障礙觀一切佛廣大威德無所障
礙知一切佛遊戲神通無所障礙證一切佛
甚深智力無所障礙入一切佛大功德海無
所障礙與一切佛無上法雲無所障礙受一

伏七

十

切佛無量法雨無所障礙於諸佛法修習妙
行無所障礙知一切佛轉妙法輪平等智性
無所障礙入一切佛道場衆海現神通力無
所障礙隨順十方一切諸佛所起妙行無所
障礙觀察十方一切諸佛演說妙法無所障

礙普入十方一切佛刹咸起神通無所障礙
大悲攝受十方衆生令其出苦無所障礙常
起大慈充滿十方與衆生樂無所障礙普見
十方一切諸佛心無厭足無所障礙普入十
方一切衆生種種解海無所障礙普知十方
一切衆生種種根海無所障礙普知十方一
切衆生種種業海無所障礙善男子我唯知
此般若波羅蜜清淨光明三昧法門如諸菩
薩摩訶薩所入甚深究竟智海所淨最勝諸
法境界所達一切諸佛法門所往十方無量

佛刹所有大智總持光明所住圓滿自在三
昧所現清淨種種神通所具無盡辯才大海
所得無畏美妙音聲善巧宣說諸地功德所
能擁護一切衆生而我何能知其妙行歎其
功德顯其境界讚其願力現其光明入其度

伏七

十一

門達其所證集其勝業了其次第如其普徧
住其三昧見其心境說其正道辯其威勢得
其所有平等智慧善男子從此南行至海潮
處彼有大城名圓滿光其城有王名妙圓光
於彼城東有一園林名普莊嚴王有夫人名

伊舍那爲優婆夷止住此林修菩薩行汝往
彼問菩薩云何學菩薩行修菩薩道時善財
童子於海幢比丘所得最勝法獲堅固身證
三昧境究竟明徹住清淨解悟深法界其心
隨順諸佛教海於諸法門憶持不忘安住廣
大普莊嚴門智慧光耀充滿十方心生歡喜
踊躍無量五體投地禮海幢足繞無量帀重
復頂禮恭敬瞻仰思惟觀察想其容止持其
名號念其功德觀其行願憶其言音思其三
昧想其所行廣大境界受其所得總持智慧

清淨光明咨嗟戀慕辭退南行爾時善財童子蒙善知識力令功德身信解圓滿依善知識教正念思惟念善知識語迺相開發於善知識行深生慚愧愛樂恭敬觀善知識心善巧攝受倍益歡喜作是念言因善知識令我普見一切諸佛因善知識令我普聞一切佛法善知識者是我師範示導於我一切智法普令見故善知識者是我眼目令我普見諸佛境界如虛空故善知識者是我渠流引我令入諸佛如來蓮華池故如是念念漸次南

行向海潮處至彼城東見普莊嚴園衆寶垣
墻周帀圍繞一切寶樹行列莊嚴所謂諸寶
葉樹枝葉扶踈光彩鮮明敷榮微妙諸寶華
樹雨衆妙寶拘蘇摩華發焰舒光布散于地
諸寶香樹吐妙香雲香氣氤氳普熏十方諸

伏七

十二

佛世界諸寶鬘樹雨大寶鬘莊嚴寶林處處
垂下摩尼王樹普雨種種大摩尼寶徧布充
滿隨處莊嚴一切天寶劫波衣樹普雨種種
妙寶繒綵雜色衣服隨其所應敷布嚴飾寶
音樂樹出妙樂器微風吹動發和雅音其音

美妙過諸天樂諸寶資具莊嚴藏樹各雨衆
寶珍竒玩好諸莊嚴具處處分布以爲嚴飾
其地清淨無有高下寬廣平坦種種莊嚴園
中具有百萬殿堂大摩尼寶之所合成百萬
樓閣閭浮檀金以爲校飾百萬宮殿毗盧遮
那摩尼寶王間錯莊嚴雲構龍蟠延袤遠近
薨棟相承勢如飛動百萬浴池七寶合成一
切妙寶以爲其岸細妙金沙澄布其底七寶
階道摩尼欄楯周帀圍繞四面莊嚴寶草芬
芳夤緣際畔栴檀香水盈滿其中調適溫涼

隨衆生意寶樹林間寶渠分布水精寶珠周
徧間錯晝夜常流八功德水水中多有鳧鴈
鴛鴦白鶴孔雀迦陵頻伽拘枳羅等雜色諸
鳥飛集往來遊戲出没整毛理翮游泳翻翔
出妙好聲清切和雅猶如天樂令人樂聞寶

伏七

十三

多羅樹周帀行列覆以寶網垂諸金鈴微風
徐搖恒出美音建立無數摩尼寶幢雜寶繒
旛四面垂飾光明普照百千由旬其中復有
百萬陂池香水湛然清瑩澄澈隨時堅細栴
檀香泥澄塗其下一切上妙衆寶蓮華菡萏

芬敷大摩尼華光色照耀園中復有廣大宮
殿名莊嚴幢海藏妙寶以爲其地種種形像
悉現其中毗瑠璃寶以爲其柱閻浮檀金寶
莊嚴網彌覆其上重樓挾閣巍巍高大猶妙
金山見者欣樂種種勝寶以爲莊嚴光藏摩
尼恒吐妙光以爲照耀毗盧遮那藏摩尼寶
王殊麗校飾輝映分明一切衆寶無價香王
咸出妙香普熏一切所謂具足一切最勝妙
寶香王香氣普騰氤氳成霧普現如意妙寶
香王香氣隨應周聞法界隨根覺悟妙寶香

王凡所臬聞諸根聰利能於正法精勤匪懈
其宮殿中復有無量寶蓮華座周廻布列所
謂光照十方妙藏摩尼寶蓮華座毗盧遮那
如意摩尼寶蓮華座無垢藏摩尼寶蓮華座
雜寶莊嚴摩尼寶蓮華座普門莊嚴摩尼寶
蓮華座圓光莊嚴摩尼寶蓮華座安住海藏
清淨莊嚴摩尼寶蓮華座普焰光照摩尼寶
蓮華座金剛藏師子摩尼寶蓮華座照耀世
間摩尼寶蓮華座如是無量摩尼寶蓮華座
一一皆以不可思議妙寶繒帶四面垂飾不

可思議衆色摩尼以爲莊校於宮殿中光影
相照平等莊嚴空中復有百萬寶帳所謂寶
衣帳寶鬘帳寶華帳寶香帳閻浮檀金帳寶
枝垂覆帳雜寶摩尼帳妙寶瓔珞帳光焰金
剛帳諸天妓樂帳象王神變帳馬王神變帳

伏七

十四

帝釋所坐摩尼寶帳如是種種寶莊嚴帳嚴
飾虛空復有百萬諸大寶網彌覆其上所謂
寶鈴網寶蓋網寶身網海藏真珠網紺瑠璃
摩尼寶網師子摩尼寶網月光摩尼寶
網一切人天種種形像寶香網一切雜色寶

冠網一切妙寶瓔珞網如是等網各於其上
垂覆莊嚴復有百萬大寶光明而爲照耀所
謂焰光摩尼寶光明日藏摩尼寶光明月藏
摩尼寶光明香焰摩尼寶光明吉祥焰藏摩
尼寶光明蓮華焰藏摩尼寶光明焰幢摩尼
寶光明大焰摩尼寶光明徧照十方摩尼寶
光明普現香雲莊嚴具摩尼寶光明如是等
類大寶光明而爲照耀常雨百萬莊嚴具雲
隨意受用百萬隨時芬馥白梅檀香雲普熏
道場百萬天諸妙樂雲音聲美妙百萬天曼

陀羅華雲而爲布散百萬諸天髮帶雲處處
垂下以爲嚴飾百萬天寶繒綵雲處處垂布
以爲衣服百萬出過諸天寶瓔珞雲莊嚴林
樹及諸樓閣百萬欲界天子欣樂瞻仰恭敬
作禮百萬諸天嫫女往修同行常來其所投

伏七

十五

身而下親近敬奉百萬諸大菩薩恒詣道場
常樂聞法時伊舍那具大人相坐真金座戴
海藏真珠網冠挂出過諸天真金寶釧垂紺
青髮頂髻莊嚴吉祥焰藏摩尼寶王以爲髻
帶毗瑠璃摩尼寶以爲耳璫師子口摩尼寶

緣飾耳輪大如意摩尼寶王以爲瓔珞莊嚴
其頸大威德帝青摩尼寶網以覆其首種種
光焰熾盛摩尼寶網羅覆其身百千億那由
他衆生曲躬恭敬親近供養東方有無量衆
生來詣其所謂大梵天梵輔天梵衆天如
是色界一切諸天欲界他化自在天化樂天
兜率天夜摩天忉利天諸龍夜叉乾闥婆阿
脩羅迦樓羅緊那羅摩睺羅伽及鳩槃荼閻
羅王界大力鬼神乃至一切人及非人諸王
衆等南西北方四維上下亦復如是其有見

此優婆夷者身病心病種種所纏一切邪見
障礙執著所有惑苦悉得除滅速離一切諸
煩惱垢速拔一切諸見毒刺疾破一切諸障
礙山深入無礙清淨境界種植一切圓滿善
根長養一切善法根芽入於一切清淨智門
普獲一切陀羅尼門普證一切大三昧海通
達一切諸佛教海一切諸佛廣大願門無不
開發一切菩薩所修妙行皆悉現前一切如
來功德大海皆悉清淨其心廣大具足一切
自在神通其身無礙於一切處靡所不至普

詣十方無所依著隨順成就一切法門爾時
善財童子入普莊嚴園周徧觀察見伊舍那
優婆夷往詣其所頂禮其足繞無數帛正立
合掌白言聖者我已先發阿耨多羅三藐三
菩提心而未知菩薩云何學菩薩行云何修

伏七

十六

菩薩道我聞聖者善能誘誨諸菩薩衆願爲
我說時伊舍那告善財言善男子我得菩薩
一解脫門無間修習若有衆生暫見我身暫
聞我名或聽我法憶念於我與我同住親近
隨順供給我者悉不唐捐善男子若有衆生

不種善根不爲善友之所攝受不爲諸佛之所護念雖近於我經於多時與我同住終不能見善男子其有衆生得見我者皆於阿耨多羅三藐三菩提獲不退轉善男子東方所有一切如來應正等覺常來至此處於衆寶妙師子座爲我說法南西北方四維上下一切如來悉來至此處於寶座爲我說法善男子我常不離見佛聞法與諸菩薩而共同住不離菩薩三昧解脫善男子此會衆有八萬四千億那由他常在於此普莊嚴園與我

同住皆於往昔與我修習一切菩薩同類行
門不相離故一切咸於阿耨多羅三藐三菩
提得不退轉其餘衆生或久或近住此園者
一切修我同類行門亦皆普入不退轉位善
財白言聖者發阿耨多羅三藐三菩提心爲

伏七

十七

久近耶答言善男子我憶曾於然燈佛所親
近承事修行梵行恭敬供養聞法受持次前
於離垢佛所出家學道受持正法次前於星
宿幢佛所聞法修行歡喜供養次前於妙勝
吉祥佛所次前於蓮華德藏佛所次前於毗

盧遮那佛所次前於普眼佛所次前於梵壽
佛所次前於金剛齊佛所次前於水天佛所
善男子我憶過去於無量劫無量生中如是
次第三十六恒河沙佛所皆悉親近一心承
事恭敬供養出家學道所受正法所發誓願
所入三昧所證解脫如是一切種種行門我
皆憶持心無廢忘過此已往佛智所知非我
能測善男子應知菩薩初發心無有量充滿
一切法界故菩薩大悲門無有量普入一切
衆生界故菩薩大願門無有量究竟十方一

切法界故菩薩大慈門無有量普覆一切衆
生界故菩薩所修行無有量於一切刹一切
劫中恒修習故菩薩三昧力無有量令菩薩
道不退轉故菩薩總持力無有量能持世間
隨所應聞教法海故菩薩智明力無有量普
能悟入三世佛教巧隨順故菩薩神通力無
有量普現十方一切所有諸刹網故菩薩辯
才力無有量圓音一演令諸衆生隨類解故
菩薩清淨身無有量現身普徧諸佛刹故
大方廣佛華嚴經卷第七

音釋

擎渠京切
垣垣雨元切
墻垣高曰
構古候切

也合
延延以然切
袤延袤也
薨屋棟也
鳧

音扶野
拘梵語也
枳此云好聲
翮下革

莖也又
塗魚覲切
挂古賣切
紺古暗切

而含
緣伏七
飾綠俞綰切
亦飾也
唐十六
捐捐余專切

謂徒
赤也
棄也

十六